

余文敏公文集

余文敏公文集卷之六

張司馬先生傳

夫嫺文學者不習為吏習為吏者多足已而不學見謂熟俎豆之事授以司馬法不達此曷以故焉鄙語曰尺有所短寸有所長完人之難也余自燥髮時則知有東沙張先生云先生以經術取卿大夫所居吏盡吏職所從學遵先王之業而潤色之治禮禮辨治兵兵律具儻所謂完人非邪先生諱時徹字惟靜系出冠族族代有

聞人至先生與文定公前後起家大司馬文定
於先生子行而先生師事之二十舉於鄉二十
四舉進士筮官南都主膳司事為郎司武銓司
儀曹稍遷副使督江右學倘兵臨清叅知福建
政事長雲南臬既轄山東藩為右使改湖廣轉
河南左以御史大夫開府四川改江右遷南少
司寇改少司馬以尚書贊南都軍興事所試功
效卓爾殷施爛焉余輒欲為論著事多具里人
沈明臣余寅吳人王穉登傳中余故不數數論

論其大者先生持文秉廣厲學官之路勅郡國
縣道邑不得受請寄有秀才異等待之不次其
不事學若下才輒斥之士莫不瞿然顧化先生
執憲平鈎校律令一遵 皇帝李法不以委曲
生意訟者蝟集吏抱牘隆隆起先生立斷之如
馳填重地則嚴列卒置伯格長多間謀弭盜盜
不敢入境按殊域以嚴束吏務在擊奸止邪土
酋保贖蝮蟻擅磔人人莫誰何先生立撲殺之
一切威名流聞夷萌懼伏諸蕃更徭徵發如雨

案比不謫猾胥因緣為奸豪右得避賦而居其
物先生為括嘗筭度費供著為籍於是占者庾
蔽者彫剋者無所隱賴其在閩在楚在梁類視
此楚蜀歲侵民不能輸漕粟則發帑金代之輸
而緩徵以補帑民饑甚則給粥不甚捐倉廩又
不甚則下平糴令貸諸侯王金輸邊饒以稔歲
取償收民間貨飭厨傳而官給之廩以為直所
以周急繼困便利百姓之道甚簡周王者
天子叔也賦入不足供常祿有司不以時內內

不能無侵牟其間先生曰祖宗封立子弟所以
序骨肉貴支體廣同姓於天下也獨柰何窘之
若是輒下有司內如制而禁府吏毋乾沒以病
輸賦者蜀王居國富多從其官屬權辜為奸利
有所闡出茶鹽捕者訟共禁弗予相橫甚先生
庶得其狀亟法之而今相門弗得奪有司權黔
國公私權酒械釀者則以旱為解先生破其械
釋之曰無益旱也大將軍仇鸞以肺附幸於
天子挾天子寵靈侵兵事先生持之堅鸞銜先

生疏請先生視兵塞上幾得當甘心焉然卒不
能有加於先生御史大夫商大節嘗悟鸞鵠中
之遠詔獄坐殊死先生上疏訟其冤畧曰夫士
卒盡家人子起田中從軍大節訓之一年所稍
有緒而為蜚語所中請宥大節弗治除過通籍
以責成功幸甚天子大怒下詔切責先生閣
臣惶恐為先生請死天子怒稍解命奪二俸
白草番攻石泉掠安縣鹵一提督官先生為師
期將擊之諸大夫言擊之不便先生曰直患賦

不贍士不力誠力何可得養寇為諸大夫憂計
蜀將亡喻何卿則召卿授方畧已勒習兵申明
約束開壁而馳之凡數十戰戰疾擒其酋五人
破寨五十毀碉房四千八百馘俘千五百有奇
馬裸番畔所部副使朱簠奉先生檄討平之夫
先生箇折衝之具以裒戎師討白草則克討馬
裸則克幾可謂能軍矣顧守南都不得志倭寇
非先生過也余官南都南都士驚且憤不知尺
籍伍符先生在事甫一月非素拊循者倭一旦

薄城下其勢誠棘所失亡亦不甚多即所白處
奏征繕凡十疏天子皆報可非不知先生先
生持大臣體當自効而蒿相阨之竟免先生免
而倭愈熾先生營職十四凡三黜督學黜執憲
黜本兵黜則以先生守經据古不阿當世所與
悟者非諸侯王則大將軍則嬖豎則柄臣計先
生所規撫詎云若爾而休亦遂行日昃盡三事
始稅耳先生歸時年五十五歸二十餘年甚健
飯然卒無能用之者語曰參輪可使自轉木雕

猶能獨飛先生顧與若伍乎先生貌莊秉寔隱
惻生平無詭步無惰容燕居必冠申申如也人
曰初見張司馬令人懃然不能去去不能不令人
思群從子姓故人所善賓客仰衣食先生俸入
皆以給之以其貴下人誠門下客至無蚤莫無
留門者尤好推轂士即年少官薄或巖穴隱淪
先生與游嘗引以為資於已聞一善進之惟恐
後不善與語亦惟恐傷之先生好書於六經典
與舊章憲式無所不窺而尤勤著述其屬書摘

辭要歸大雅直轢古今為藝士嚆矢不獨東人
士斐然嚮風即天下得睹先生辭者莫不以先
生為鵠附而成名者甚衆所著芝園集外集別
集銓定 國朝文為文範文苑行於世史某曰
余居鄉從諸大夫游豈不多賢張先生知是以
當世取舍而濶達多䟽節豈與委瑣齷齪園牧
等庸乎其峭直為方非夫卑卑之流至折節下
士有味其言之也猶可得以收天下士心諺云
桃李不言下自成蹊先生似焉先生嘗謂余士

所稱不朽者惟文章功業以今觀先生身無數
器是先生所自有之矣

節孝傳

世典所稱節孝之風豈獨臣事君子事父然哉
亦有賢婦人焉婦人以其姁德獨行標幟寓內
視臣節子孝同爭名不朽皎若日月斯亦是貴
矣夫為人臣若子者得漸磨教化口先王目詩
書是非激於中而風轂鼓舞於其外其識而能
蹈鵠而必為惟其所資藉與其所從吏甚便也

即中人能辦之然叔季風靡趨下江河斁倫擾
紀者往往而是求之且什不得一二焉彼筭禕
之流至微也瑾耳藩目顓卮自若也窮簷救閭
無閨閣之儲文史之訓也閩域覲嚴酒漿是議
非有轂光之赫外域之遑觀也而能識所性之
倫蹈其所乘之純懿苟其志成矣即攻辛茹荼
壅關閉伍拮据匍匐甘之如飴其視有所資藉
從吏而能然者宜不待辨也是曷以故焉誠至
性結於心不得而解耳彼斁倫擾紀者見之不

泚然汗下而反步懼走者幾矣是人也得殷施
於世將使賢者奮不肖者恥人倫不變為異類
者必此之人夫是勿可泯矣作節孝傳

張氏潤玉鄞人趙瑞妻也瑞家故涼瑞死遺二
孤舅姑垂白堂上無強近之親饑寒不聊生活
人咸為張難之曰傷哉貧也即男子難為工矣
張曰是豈為未亡人重此生惟不忍二孤失所
家大人無以為養相引入溝壑也地下有言未
亡人何以為解即椎布操作躬織絰以給日至

斗飯尺縉無不自其手指所自出蓋閱數十年
首蓬容厯朝夕惴惴以邀惠逝者則曰可歸報
地下耳卒能給舅姑以沒世而二孤且以次成
立矣二孤者長名龍娶孫氏蕙芳時張且老家
殖曲落龍下帷授弟子易束脩之外嘆嘆橐中
囊耳不能備甘毳孫則脫簪珥取給旦暮自上
食率一日再餐必鮮飽再不繼則截髮售隣媪
以易之且不令張見曰懼傷大人志也夫夜讀
呻呬孫常以女紅相後乃覲謁溫清焉蓋張與

孫形影相吊喘息相屬若焮焮相倚為命云史氏曰夫立孤難於死節色難於養以余觀於二氏又何易也彼劈面剗股者一時之決耳乃若子在抱上無所蒂下無所根踟躕佇歧或有幾於將養而存絕不可知若量力計期則日月遐邈褚無長貲將藐諸之謂何彼姑氏衰暮而就養勤匱無所仰以為撫命井曰不任矣即畢力操具而神心阻廢又胡能以色為養也其能此者艱貞之義左右不匱之思過人遠哉嗟嗟乎

姑婦各成其信二倫是經無遺憾焉然又何後
先相濟萃於一門也余嘗獲從遊趙君固知蘭
根醴源有所自矣非賢姑婦曷能相其夫子而
德若是乎趙君與余善是以得具論之

文昌像贊

倬彼文昌有韓其光宮維六府斗魁戴匡計主
天道階陟天皇化幻至人柄持文章喻精吐曜
降梓潼之鄉乃現睟容穆矣洋洋炯炯貫中雲
錦繡裳上撐參宿下敷文於八方惟是設像示
我周行去聖胡遠茲焉可望

友山李公贊

先生醇茂濬發華胄頤而豐下睟睟粹秀德心
恂恂金鑒玉貞在原敦友循坎孝親令儀鳳翥

清塵鴻舉高蹈玄轍式賓西序晞巢洗心披荏
嗣音六奇為寶四業是謔表的閭里維德之紀
輔財重諾坦矣素履天鑒斐忱繼續繩繩龍驤
豹隱霧滃雲蒸生有屨杖沒有圖像我儀頌之
奕然精爽

擬冬至節宴 兩宮聖母致語

伏以一陽來復化生見天地之心百順承懽尊
養極 帝王之孝會南陸晷從節至幸東朝慶
與時新喜溢璇宮光騰紫禁恭惟 聖母仁聖
懿安康靜皇太后陛下柔嘉作則夙垂葛覃穆
木之風 慈聖宣文明肅皇太后陛下 聖善
儲禎茂衍麟趾螽斯之盛徽問與五辰而並運
璇源凝六氣以交融我 皇上圖大宅中順時
布政乾旋坤轉符貞元闡闢之功海宴河清際

宇宙亨嘉之會茲者月維建子序屬升陽璧月
珠星兆啟踐長之瑞彤闈玉殿爰開獻壽之筵
鸞輿並下於雲中 龍袞親承於日下景添宮
線引壺觴九醞咸和律應黃鍾奏簫管八風正
協迎祥而薦冰紈繡襪候氣則飛緹室葭灰共
誇景福逐陽生陽復一陽歛千祥而並泰還道
慈齡隨日始日舒一日衍萬載以長春西王母
不老瑤池北極君常操斗柄臣等叨叅法部幸
值芳辰御陞陳音莫效八能之技廣廷侍宴實

深三祝之誠敬代登歌敢賡俚句

暖律初回令節傳承歡長樂會群仙鸞輿並

駕祥雲至龍袞偏承化日鮮綬室葭飛張廣

樂瑤池桃熟敞華筵迎長慶洽慈顏豫載頌

周詩燕喜篇

郝寅樓封君壽日帳詞有引

伏以僊齡初度迎一陽初復之熙辰愛景長添
屆百歲長生之令節昴宿輝聯於南極星杓光
映乎北堂遐算熾昌微情闔懌恭惟扶輿間氣

寰寓殊才山斗竒標挺層霄而特出滄溟洪宇
併大塊以無容獨鶴翥於雲間昂藏罕世祥麟
遊於世上瓌偉莫京迥若列仙之儔巍然萬夫
之傑天星孕秀叶夢於熊羆江漢炳靈降神於
崧嶽邁古稀而逾七歲適當肆樂之時殷冬仲
而過一旬喜值懸弧之旦集耆英於洛下與彥
博而齊庚會真率於花前並安之而同甲日晷
將增乎繡線羨喬年如日斯升陽琯欲動乎葭
灰慶純嘏隨陽而長黃鍾開統柔風淡蕩拂珠

簾青女司權和氣鬱葱浮綺戶梅枝英泄點鶴
髮以滋瓊芸艸香飄鵲袍而加馥漱華池餐
瑤藥拖綠玉杖以委蛇服石髓茹紫芝誦黃庭
經而容與籌方添乎瀛海籍已注於丹臺數久
列於香山紀將超乎絳縣一千年花一千年實
看幾度之蟠菴五百歲春五百歲秋等億年之
椿木其將陳地履正逢獻履之朝擬薦霞觴恰
際舉觴之月奏南飛之曲路阻未能賡難老之
章詞蕪不逮敬歌越調用布燕私

詞曰

新陽肇序正屆懸弧際圭景舒珠星聚卿雲籠
瑞彩愛日溶清氣人道是神仙此日生塵世

時當七七齡壽定千千歲祝堂前多蘭桂孫枝
奕葉長玉樹芬芳麗看他年龍章鸞誥應相
繼

右調千秋歲

擬加上 孝懿皇后謚勅

朕惟帝王至德要道之治始於家邦人子顯親揚名之心均于父母此天地之大經倫制之先務也伏惟 皇妣孝懿皇后首嬪 皇考克襄潛闡坤儀純備慈惠周渥中閨之教厥惟托始慶澤所衍爰啟冲人而徽音昇掩至今感悼昔我 皇考踐祚之始雖已寵加謚號賁于泉壤今朕繼守宗祧尚襲舊稱非所以闡 懿淑祔陵廟昭孝思之永而示來標以不泯也朕何敢

寧爾禮部其集文武群臣議之務備尊稱以稱
朕意且具儀擇日以聞

瑞雪表

伏以 聖主秉精誠秘殿特嚴乎素禱 皇穹
昭響應仙寰徧沐乎洪垂徵大有以流祥普太和
而洽慶臣民胥懌遐邇騰懽恭惟 皇上德契
先天心涵太素把持九氣調雨暘寒燠以若時
驅役萬靈攝上下神祇而聽命乾坤屬其參贊
能轉能旋民物囿於甄陶昌康昌阜然且軫懷
黎庶長厯無逸之心因以昭示皇天祇薦惟馨
之德頃者時當正臘序屬祈寒念雪為五穀之

精而多則屢豐之兆二白雖賜未蒙三白之恩
微潤屢霑更求洪潤之渥廼修禋於雷壇用虔
禱乎玄滋籲叩九穹攄宸衷而上徹法週三限
獲天鑒以潛通俄焉霽黶同雲崇朝滂作繼則
繽紛密霰竟夕遂零洒向仙宮皎若玉京而連
璐鋪勻御苑晃如銀海以堆瓊滋變種溉禾胎
信卜堯年之豐稔滌氛葩湔沴孽允占禹甸之
清寧嘉祥以協應而奇母或先母或後恩瑞不
暫施而足至於再至於三是誠天地為徒幹樞

陽機陰之妙用而造化在手廓調鈞噓籥之神
功也臣等恩被霑濡職慚燮理愧乏梁園之賦
眎禁樹以增輝載賡周頌之章冀來年而樂育
伏願 宸禧浩演 聖壽滋延和保天倪而形
和氣和心和萃和庥於五位泰亨昌祚而國泰
家泰民泰衍泰祉於億齡

祥露表

伏以 瑤穹錫貺昭呈萬壽之殊禎寶地發靈
茂介一陽之大慶滉靈膏而集祉沾仁澤以承

床喜洽黃輿懽騰紫禁恭遇皇上神凝太素

道洽始清知化窮神鼓陰陽之秘籥履中建極

邁寰寓之玄機精禋上達乎九穹謨烈重光乎

二聖仁孝孚而太和交鬯帝親格而靈貺薦

頒兩間集有羨之休徵萬寓赫無前之瑞應茲

逢至日臺史書祥仰見顯陵守臣獻瑞軒精

注液天乳結津漣茂樹以垂柯湛湛乎星繁雪

皎綴喬松以泫葉纍繁乎玉聚珠聯素委馨流

神漿可挹脂凝飴美天酒自零矧當陽復之熙

辰見陽禧與陽而滋長適在聖祖之壽域知
聖衷與聖而感通時以作昌兆億年之玉算地
不愛寶衍萬劫之瓊潢信祖澤之非常為玄
恩之特注儼寰瀛而罕矚稽圖牒而渺聞者也
臣久荷霑濡幸逢熙盛占祥東極祝聖壽以
呼嵩軼美西崑頌皇仁而擊壤伏願天庥日
熾昊眷雲臻心和氣和形和億萬年調和乎玉
燭身泰國泰世泰百千載保泰乎金甌

擬立東宮奉賀 皇后表

伏以 坤順承乾蚤協燕禘之吉離明出震濬
開鶴禁之祥集大慶於長秋仰重光於旭日恭
惟 皇后殿下婉芳嫺美姜任作配

紫宸樂好述之淵德龍芬彤管嗣允穆之徽音
大化洽乎開睢庥徵麟趾至仁敷於樛木瑞應
螽斯爰錫祚胤之昌快覩 皇儲之建幼海湧
璿源而溥潤前星拱寶婺以流輝 九廟居歆
聿承祧之有子六宮溢喜戴主器之得人 鳳
輦藹祥光映鸞旌而璀璨枌房浮佳氣繞桂殿

以氤氲宴等敦復內儀窺觀盛典金甌有托期
永固於苞桑玉葉載繁碩益綿乎瓜瓞

余文敏公文集卷之七

辭免恩命疏

臣某謹奏為披瀝愚誠辭免殊常 恩命事本
月十九日准吏部咨傳奉 勅旨掌詹事府事
吏部左侍郎余某陞禮部尚書兼文淵閣大學
士俱令與張某等入閣辦事如勅奉行欽此臣
聞 恩命不勝感戴不勝驚悚竊惟內閣乃樞
機之地閣臣為丞弼之官非才德邁乎時流何
以贊襄化理非文學追乎前哲何以裨益論思

故嘗不備其官以待異能之士伏念臣章縫末
品佔俾庸儒徒以遭邁非常遂爾踐敗不次
皇上出閣臣叨侍從之班 皇上覃恩臣忝坊
寮之轉既待罪乎畱院復糜祿于南雍尋以養
疴得蒙 予告仰荷 皇上不遺簪履忽沛
絲綸起臣于里閭試臣以職事令貳官廡之秩
仍居典胄之司旋陟銓曹更視宮篆屬方重修
會典遂令濫副總裁惟汗青之無期方尸素之
是懼敢期非望之福遽加不肖之軀閣學崇階

俾綴演綸之直秩宗華貫令陪曳履之班榮渥
并加超逾更甚此蓋皇上深惟國家之計永
保治安過採老成之言遽蒙拔擢豈臣薄劣可
任使令德不足以樹表儀才不足以當經濟學
不足以備聖問文不足以代王言力莫從
心任更踰噐皇上繼憐而拂拭臣駕亦何以
驅馳況今名碩在朝足稱臯夔一德之佐豈令
庸臣遙列致玷堯舜知人之明若不控辭覲而
從事則力小任重不徒負荷之艱抑福薄噐盈

必致顛越之咎伏願 皇上鑒臣自揣非虛察
臣所言匪矯收回成命仍守舊官俾畢意編摩
以矢忠補報庶上不負 聖恩下得安愚分矣
臣愚無任激切懇祈之至

辭免獻俘加恩疏

奏為辭免殊常 恩命以安愚分事本月某日

該吏部咨欽奉

勅諭

云

欽此傳示到臣臣方

抱疴跼伏私寓聞

命震惕拊已悚慙竊以非

常之典乃

聖主之特恩無妄之榮則人臣之

深愧頃者逆賊岳鳳等倡亂雲南為謀日久而
我兵計不旋踵用不移時無亡矢遺鏃之勞而
收獻俘執馘之績此皆仰仗我皇上威靈震
疊聖武布昭穹昊垂庥祖宗錫佑是以勇
士謀臣咸奮而用命天時人事並會以成功也
臣偶幸遭逢實深欣躍顧因呻吟牀第之下不
獲拜舞闕廷之前悵恨何言凌兢未已何乃誤
蒙渥寵顯被殊施濫進崇階橫加恩廕夫貳
公秩峻三殿班崇賞重世延榮優綸誥臣何人

者乃堪此哉竊惟 朝廷慶賞激勸攸存有功
者尚難躡踰非分者豈容忝竊臣以櫟櫟小材
章縫末學具員禁近既無矢石之勞待罪文資
又異戎行之任雖嘗預忝于帷議實皆仰稟乎
廟謨豈敢貪冒天功致滋物議况臣向嬰賤疾
疏乞微身 聖慈雖優厚而尚寬臣愚實憂惶
而失序豈宜以未可知之餘數而受不易報之
洪恩若求退而進猶未已方辭而受且不疑實
人心之共唾亦天道之必忌者此臣所以并看

側身而無敢當跼天躋地而不能已者也伏望
皇上俯察愚忱特收成命俾臣稍安分誼苟延
晷光則鳬鵠之量庶幾可全而犬馬之愚亦幸
自遂矣

再疏

奏為再瀝微誠懇回成命以重恩典以明臣分
事本月初五日伏蒙 皇上以雲南大捷推
恩諸臣加臣少傅兼太子太傅進 建極殿大
學士廕一子中書舍人給與應得 誥命臣伏

枕在告倉惶不安隨具疏辭免奉 聖旨平夷

獻逆捷功殊常卿協忠運籌茂著勞績加恩眷
酬已有成命宜欽承勿辭吏部知道欽此天鑒

未回寵章仍賜輒敢披瀝以罄愚忱臣聞爵以

馭功 國典最重敬事後食臣義當安今惟有

萬一分之勞而當不勝既之賞即有胸無心者

皆不知其不可矣雲南之捷實我 皇上神威

聖武諸將矢謀戮力所致臣備員次輔不能有所

輸報久叨厚祿不能有所建明何敢苟貪意外

之寵榮不顧臣子之分義乎況臣沉頓久疾弱
躋私居方控危情以乞餘日今位未及避而更
冒進位之榮賞不能酬而且叨延賞之典其甚
不可尤所易知即如 聖意以為功成廟筭

恩始近臣則首先決策黷縱授人若大學士申
某者固不嫌於厚敘而臣不過因人成事袖手
蒙成未始運籌詎當勞績即 皇上憐而私之
然非分而誤恩無功而竊位不特難逃乎尸素
且將不免於顛濟此臣之拊臆疚心兢兢不能

已也伏望 皇上諒中誠之控非由外飾小盈
之器難以大期特賜允俞俯從微懇俾守舊秩
端寢廕恩庶分願適諧而疵議可免亦形魂無
媿而餘生可延雖九遷之榮十世之賞不足以
踰 聖慈之優渥矣

辭免陞蔭疏

伏以春宮峻秩非碩德不加世賞殊恩非繁勞
不得若夫絲綸寵命尤為縫掖至榮臣何人斯
足以當此竊念臣品流最劣學識尤庸謬蒙

皇上特達之知俾叅內閣幾務之重荏苒已幾
數月報答絕無一分既不能隨事匡持共裨國
是又不能積誠獻替仰沃宸衷真是素餐詎止
充位茲者恭逢大慶率土覃恩臣懽忭方與人
同豈寵榮獨惟已竊惟遭逢有自顧稱塞為艱
二臣叅政有年嘗著有勞勩而臣共事無幾敢
驟得僥倖且德薄而賞優不容公議即力小而
任重必負恩私揣分奚堪覲顏為甚伏願收回
新命俾復舊銜臣當俯激懦愚策礪駑鈍上以

仰酬乎高厚下得少補於涓埃庶幾苟安陋庸
亦獲免至顛隕

乞卹典疏

奏為懇乞 天恩俯賜卹典事臣草茅賤士遭
際 聖明誤蒙 皇上眷知拔置密勿柰臣命
薄福過災生臣妻 誥封泚人今 贈一品夫人
水氏不幸病故竊念臣年十六臣父率于官止
存臣母一人終鮮兄弟且家徒四壁苟無強近
之親臣妻日則操井臼為臣母菽水之供夜則

辟絲纊為臣燈火之費勸臣力學僥倖出身自
臣居官二十餘年臣妻不妄衣寸帛是臣處窮
則甘糟糠之困臣出宦未嘗受祿翟之榮既相
臣於窮時使臣無內顧而不廢學復相臣於宦
日使臣無交謫而不廢官今臣荷天地之恩渥
被寵光而臣妻隕絕不祿臣依日月之側不敢
請告而臣妻暴露未藏臣欲治其喪則塋墓無
地欲歸其櫬則道路甚遙乃致旅魂漂泊形影
相隨終夜皇皇未知處所臣查得嘉靖年間南

京工部尚書崔文奎妻杜氏封淑人病故後贈
二品夫人禮部以例該并造夫壙得祭塋夫人
例隆慶年間吏部左侍郎殷士儋妻翟氏封淑
人病故先帝以其為講幄舊臣特賜與祭塋
今臣妻封淑人正與二臣妻事體相同然臣蒙
恩甫入閣逾月而臣妻即故臣妻故甫逾月而
即蒙恩贈一品夫人又與二臣妻似少有間
二臣喪歸而得請臣今喪欲歸而不能臣叨竊
逾涯豈敢過有所希冀而臣私情未盡故不得

不哀鳴于 君父之前伏望 皇上察臣至情
非出得已特賜臣妻祭塋以全臣夫婦之情則
死者地下啻恩而臣生者當誓死圖報矣

謝恩疏

謹奏為恭謝天恩事該臣患病調理伏蒙 聖
恩欽遣御前牌子耿清齋賜臣鮮猪一口鮮羊
一羮甜醬瓜茄一罈白米二石酒十瓶到臣私
寓臣謹焚香望 闕力疾扶掖叩頭祇領訖念
臣樗櫟棄才蒲柳弱質偶罹霜露之恙遽干休

沐之恩輒荷仁慈給予寬假忽播綸音於中
使載傳珍品於尚方天澤下流枯荇藉之滋潤
帝星垂照災殄自爾禳除顧臣何緣仰承殊眷
感深銘刻苟全螻蟻之生矢竭捐糜不遺犬馬
之力臣無任感激頂戴之至

乞假調理疏

謹奏為患病侵尋乞假調理事臣自五月以來
偶患痰火失於調攝遂爾纏綿即今醫藥多方
罔能奏效客邪下煽逆氣上衝以致關節不通

閉塞成否腸胃不能傳送飲食極其艱難乃至
一日之間止吞數匙饘粥雖日出強勉供事而
勢力已不可支鑒者診臣之脉言非藥石能療
必須靜養或可望痊臣故不得已陳情仰干天
聽乞賜給假旬日俾就便安得以收斂精神專
一心志庶煩疴可却而平復有期矣臣不勝祈
懇懇切之至

乞歸疏

臣某謹奏為疾患纏綿職業久曠懇乞 聖恩

放歸調理事竊念臣臃腫朽才苦窳賤質誤塵
密勿游躐高華矢竭捐糜少圖報塞詎期力小
任重福過災生致深煩疴疏請給假伏蒙賜允
重荷軫存臣感極涕零心口自語仰惟聖恩至
重臣命甚輕苟一息尚存即九死奚顧豈忍言
去以負恩私且謂旬日之間可望痊復便當勉
出不敢偷安柰病根已深藥力罔效以故邪火
愈熾痰涎愈生胸膈判而不通脾胃耗而失職
精神日見疲繭肌體日就羸羸恭遇皇上祇

謁山陵臣不能執鞭扈駕坐是展轉牀第蹢躅
靡遑病日有加命且不測醫者言病犯囁噎勢
不可為湯液難攻月計不足須解職任從容歲
時臣今給假月餘瘵曠日甚萬不獲已懇疏乞
身仰望 皇上愍臣迫切至情憐臣委頓貞疾
放歸田里俾便攝調庶幾得瘳不至填壑如其
不救亦幸首丘矣

再疏

奏為久病未瘳 聖恩難報再疏陳乞懇賜放

歸事該臣患病疏乞回籍調理伏蒙溫旨慰留
不譴臣瘵曠而謬許以忠勤不輒賜罷免而寬
假以靜攝近以滇南奏捷渙錫殊恩山陵禮成
薦頒大賚臣既無功可錄且有病私居 皇上
猶一視同仁數加陞賞諭以承命誠勿再辭是
皇上仁慈不啻高厚真若天地之容棄物父母
之養驕兒凡有人心咸思奮激即同狗馬尚爾
依依豈忍言去臣叨冒崇階虛糜積歲在天地
中未竭涓埃在父母下無裨毫髮曠廢職業罪

積如山又何敢言去碩臣緣薄命蹇疹逼災仍
自疏告以來又逾一月仰遵 聖諭靜攝從容
異得痊安勉出供事柰病根未拔病勢日沉藥
餌無功疲繭益甚醫者言脾胃為身軀之主飲
食乃血氣之原脾氣既虛不能進食精血未足
何以肥身必多假歲時庶可望平復臣故日夜
悚仄寢處徬徨竊思密勿鼎司非臥理之地高
秩厚祿豈養疴之資輒敢冒昧天威再陳前日
悃悃伏望 皇上特垂聖聽俯鑒愚誠幸乞殘

骸放歸故里俾疲駑之力少獲苟全則微蟻之
生莫非再造臣無任激切懇祈之至

三疏

奏為苦抱貞疾罄瀝危衷懇賜放還少延餘喘
事臣以久疾未瘳於九月二十五日再疏乞身
伏蒙 聖旨卿疾未愈宜專精省慮靜俟平復
如何又有此奏准寬假調攝痊日即出輔理以
副眷懷欽此臣聞命悚惶啣恩感激伏枕零涕
非筆楮所能盡宣銘心刻骨豈捐糜所可圖報

又何敢再請以上負恩私柰臣稟數甚奇受病甚恠向緣痰氣壅塞以致脾胃耗虛每日啖粥不下一匕輒遇吐痰遂有數升即欲專精而精光已銷非不省慮而慮死日甚乃氣息奄忽皮骨僅存縱使靜俟數旬料必不能平復計自給假以後倏又三月有餘夫病滿三月即當請告回籍凡厥在位不敢有違矧閣臣叅機務之繁為庶僚之表詎得偃然高臥自秋徂冬雖皇
上眷留之恩極其至渥即臣子瘵曠之罪夫復

何辭若再遷延歲時重妨賢路儻或溘先朝露
不得首丘在臣狗馬微軀固不足惜仰孤皇
上乾坤大造其將謂何用是日夜憂危身心逼
仄若無處所不能自容更殫苦情仰勤宸聽
伏望皇上推天地煦育之德回日月照臨之
光特賜允臣累疏所乞俾得休致退伏田間幸
獲優遊終其天命即死之日猶生之年

四疏

謹奏為迫切陳情懇回天聽乞賜骸骨生還鄉

里事臣於十月十二日為苦抱貞疾三疏乞歸
伏蒙 聖旨卿疾久未平朕深切軫念前已有
旨寬假調理宜安心靜攝以俟痊復不允辭吏
部知道欽此臣懇伏莊誦拊臆思惟臣有何緣
荷 皇上注念臣有何用厯 皇上慰留臣仰
奉綸音俯圖靜養柰臣病已委頓勢難苟延即
今臟腑乾枯腸胃隔絕雖饘粥不能下嚥乃疾
氣輒至填胸臣豈敢片言飾虛以欺 上聽又
豈敢一意決去以負 上恩使臣病痊有期尚

有所望臣病不得死庶可少淹頤臣病必非數
旬可痊即臣留且無一毫有補臣又以為得捐
爵位災疹或可潛消得就家鄉醫藥尤極方便
故敢冒昧累瀆懇乞仁慈夫人急難則籲天迫
切則呼父母臣怙 皇上如天依 皇上如父
母今臣迫切如此安得不控籲疾呼冀回天意
哉伏望 皇上洞察至情非敢矯詐垂憐危疾
蚤賜放歸得歛殘骸以及故里若生則幸優遊
於盛世若死亦當啣結於重泉矣

請表元峰相公啟

伏以 上公書上考三年懋調燮之鴻勲良月
際良辰千載祝熾昌之鶴筭仰黃閣聲華而愈
赫睹紫垣氣象以維新川社大來巖瞻彌峻恭
惟 元翁師相老先生台座扶輿間氣列宿元
精孔思周情學貫九經之庫班香宋艷詞傾三
峽之源忠誠上結乎 主知九重倚毗道德獨
先乎民覺百辟儀刑旋轉乾璣扶斗樞而妙運
翼宣天緯捧日轂以常中茲當奏最之時遙屬

長生之候相業方隆乎鼎鉉壽徵顯垺于泰階
新殿榮銜先政成而晉錫元甲嘉慶逢睿誕以
益增天下之達尊有三於斯為盛皇極之錫福
惟五罄無不宜二十四考在中書上趾汾陽之
美五百餘年出名世正符軻氏之期若麴蘖若
舟楫若鹽梅喜一德而咸有為日月為岡陵為
松栢羨三壽以作朋凡厠朝紳舉慰依歸之願
矧茲里戚倍深懽忭之悰爰竭芹誠謹諏穀旦
敢少伸乎燕賀冀上荅乎鴻私伏候台從以俯

臨拱竢門墻之左懇賜鈞俞而寵賁敬瞻衮舄
之輝

楊虞坡晉少師請啟

代作

伏以 上相調元屆六載書庸之候中台晉秩
冠貳公弘化之班渙異渥于 彤闈賁榮光于
紫閣王置諸左右久資雨露之功予曰有後先
幸接雲霄之武爰差穀旦共集綸扉懽深在藻
之魚歌擬食苹之鹿我有旨酒以燕樂嘉賓之
心若作和羹敢對揚 天子之命肅瑤緘而布

烟迓赤舄以生輝

上徐存齋相公啟代作

竊惟天祐老成必俾壽躋平格人歸頎頎所願
藉以儀刑若景星慶雲為國家上瑞若泰山喬
嶽為士庶具瞻緊我老師允惟先覺執政餘廿
載既旋乾以轉坤撫仕歷三朝真補天而浴
日曩者功成名遂法天道之無為乃今德邵年
高幸際帝心之簡在舉熙代非常之典愜士人
快覩之私矧廁門墻尤深忭慰猥蒙翰札更切

悚皇藹然溫渥之詞豈克當乎獎挹奕矣優隆
之賜又曷自以報酬謹附寸箋畧抒謝悃仰祈
炤荅無任瞻懸

上呂豫所相公啟代作

伏以周道南阻音塵莫及於賓階冀北天高書
問難通於記室飛馳精思徯仰光儀伏惟師相
呂老先生台座柱石九筵權衡六幕以洪鈞播
物道妙無垠以皇極經邦功歸不宰熙載而宅
百揆彌隆調鼎之勲授時而撫五辰獨贊解紃

命文敏公集卷之七
之化凡夷夏蠻貊罔不率俾雖鳥獸昆蟲亦各
咸若矧夙荷甄陶之下當倍深跂佇之私乃霄
漢之相懸倏歲時之屢換雖仰清徽而益遠嘗
詠鴻藻以增懷緬被德風草帶異蒙其餘煖邇
瞻愛日葵心愈切於迎輝猶慮冗外之蹤門墻
逾峻寧蹟高明之聽牋牒載申以布髦髦之思
少展惓惓之念杪秋伊始嚴氣將升尤望上為
宗祊善綏寢饋

余文敏公文集卷之七